

之由毀宗敗族婦人之罪實是陰賊滅人慧
明亦是獵園勘得出者譬如高羅羣鳥落之
不能奮飛又如密網衆魚投之剗腸菹肌亦
如闔坑無目投之如蛾赴火是以智者知而
遠之不受其害惡而穢之不爲此物之所惑
也

菩薩訶色欲法

四品學法

宋求那跋陀羅譯

其有三德學號真學爲上品

其持具戒學號承法爲中品

其受卑戒學號依福學爲下品

其行三事號散侍爲外品

第八

二

又真學三德者一曰戒行備具二曰多知經
法三曰能化度人是爲三德號真學者也又
承法具戒者純行五戒信審罪福奉承法教
也又依福卑戒者但持上四戒不持酒戒隨

世習俗不變俗事是爲依福學也又有散侍
三事非戒也何謂三一者身所護法二者供
養法三者於同學法持自有卷分別無師無
所承自然心好無所拘礙名散侍法也真學
功德勝於承法學百倍也承法功德勝依福
百倍也依福功德百倍勝散侍也散侍功德
勝凡俗百倍也凡俗之人或不如畜生畜生
或勝於人所以者何人作罪不止入地獄地
獄罪竟爲餓鬼餓鬼罪竟轉爲畜生畜生罪
竟乃還爲人畜生中皆畢罪便得爲人是故

人當作善奉行三尊之教學上四品之法長
離三惡道展轉天上下生人中豪尊世世受
福後長解脫若失威儀一事者當自學如法
應時自赴誠誨即解若懈怠不勤者應退著
下座後有功德乃更復之若受語不用及犯
戒者應便彈棄莫著衆中恐敗餘人若新受
法未滿三月者其有所犯先不應問也未習
故也若諸學者承用此律上下相檢乃可至
竟疾成大願
散侍法

問曰若有善男子欲入正道欲依大道而不耐戒當作何行以求福祥師曰亦有三事名散侍法好可奉何謂三一者身所護法二者供養法三者於同學法行此三事即勝作凡俗時百倍也又散侍身所能法者云何雖不持戒當與凡俗小異遊居之處數就有經道之處若見世俗所行善者法之惡者莫用好言識也醜語勿名是爲散侍第一法又散侍供養法者云何當侍三寶朝夕莫懈心常歸向並修經書若居貧窮無用供養者當加勤

仍見人福躬親佐助心代其歡是爲散侍第二法又散侍於同學法者云何當敬愛其輩無相憍慢坐起念之出入參之如已觀也若行路者近則相問遠當待望慎莫背忽是爲散侍第三法師曰行是三事雖未即度猶如地多石多草種雖不好故得少少以續其時猶勝不種也種業不廢會得好地所種乃成收歛有盈斯亦然矣行之不休福德扶持會受真戒號四品學法